

Visoki predstavnik se sastao sa sekretarom odbrane Sjedinjenih Američkih Država

Visoki predstavnik Paddy Ashdown je jučer boravio u Washingtonu gdje je imao niz sastanaka na visokom nivou. Visoki predstavnik je održao odvojene sastanke sa američkim sekretarom odbrane Donald Rumsfeldom, podsekretarom za politička pitanja, Mark Grossmanom, višim direktorom američkog Vijeća sigurnosti za evropska pitanja Daniel Friedom i zamjenikom pomoćnika sekretara Ministarstva financija za područje Evrope i Azije Nancy Lee.

Na ovim sastancima Visoki predstavnik je svoje sagovornike upoznao s napretkom koji je Bosna i Hercegovina ostvarila u toku protekle godine. Visoki predstavnik je naglasio sljedeće:

- Sud BiH je uspostavljen, započeo je sa radom i preuzeo je svoj prvi veliki slučaj, možda najveći slučaj trgovine ljudima na Balkanu
- Izvršeno je restrukturiranje Vlade na državnom nivou, premijer sada ima mandat u trajanju od pune četiri godine, a u okviru Vlade BiH formirano je Ministarstvo sigurnosti i Ministarstvo pravde
- U toku je provođenje reforme carina i uvođenje PDV-a; procesom "Buldožer" se uklanjaju prepreke poslovanju, uspostavljena je Komisija za reformu odbrane i Komisija za reformu obavještajne službe.

Visoki predstavnik je imao dugi razgovor sa američkim sekretarom odbrane Rumsfeldom o pitanju reforme u oblasti odbrane. Visoki predstavnik je objasnio da bi Bosna i Hercegovina mogla ispuniti uslove za članstvo u programu "Partnerstvo za mir", ukoliko bude provela sveobuhvatnu reformu i uspostavila jedinstven lanac komandovanja.

Visoki predstavnik i gospodin Rumsfeld su takođe razgovarali o mrežama organiziranog kriminala čije se postojanje počinje otkrivati putem istraga provedenih u carinskom sistemu i sistemu ubiranja poreza na promet, uvidom u rad javnih preduzeća i na osnovu rezultata koje je pokazala operacija "*Balkan Vice*". Razgovarali su i o sljedećim koracima koje je potrebno poduzeti kako bi se iskoristile prikupljene informacije i osiguralo uništavanje ovih mreža.

Visoki predstavnik je ukratko informirao gospodina Rumsfelda o novom pristupu korištenom u slabljenju mreža koje pružaju podršku ratnim zločincima. Visoki predstavnik je rekao: "Aktivno radimo na slabljenju ovih mreža i identificiranju osoba i sredstava koja su omogućila da tokom svih ovih godina ratni zločinci izbjegavaju hapšenje."

Visoki predstavnik je rekao da Bosna i Hercegovina i njena budućnost imaju tri vrste neprijatelja: optužene ratne zločince, organizirani kriminal i terorizam. Visoki predstavnik je rekao da u BiH na terenu djeluje pet saveznika: Sjedinjene Američke Države i aktivnosti koje poduzimaju u cilju zamrzavanja sredstava i identificiranja onih osoba koje podržavaju ratne zločince; Evropska unija i njena zabrana izdavanja viza osobama koje podržavaju optužene ratne zločince; SFOR i njegove operacije; organi vlasti BiH i sam OHR. Visoki predstavnik je rekao da svi ovi elementi trebaju dati svoj doprinos i da su po prvi put sve ove aktivnosti koordinirane.

Gospodin Rumsfeld i Visoki predstavnik su takođe razgovarali o iskustvima stečenim u BiH koja bi se mogla primjeniti u Iraku. Visoki predstavnik je ukratko pomenuo i neke od tema o kojima će opširnije govoriti u četvrtak tokom svog obraćanja IRC –u (Međunarodni komitet spasa) u Londonu. Prvo morate čvrsto nastupiti, uspostaviti autoritet i već u prvoj fazi ispuniti teške zadatke. Vladavima prava mora biti prvi prioritet jer bez nje ne može biti osigurana ni demokratija ni stabilna ekonomija. Dalje, morate biti spremni na dugotrajan poduhvat

koji će potrajati ne samo mjesecima i godinama nego decenijama.

Visoki predstavnik je rekao gospodinu Rumsfeldu da će se za dvije i po godine navršiti deset godina od završetka rata u BiH i da će biti moguće preći na drugačiju vrstu međunarodne misije u BiH, ali da to treba biti učinjeno samo onda kada postane jasno da je proces stabilizacije i pridruživanja Evropi nezaustavljiv.